

## LA PROBEZA ESPACIO-TEMPORAL NEL MUNDU RURAL (ASTURIANU)

Escritu per Andrea Menéndez Arboleya y correxíu per Daniela Cortina González.

Publicau nel llibru de les Fiestes Patronales de Santiago de Sariegu nel añu 2023.

De tola vida, unes de les (seique escasas) riqueces de les que gociaben les persones de pueblu, yeren precisamente l'abondancia de tiempu y espaciu. El tiempu dalu Dios de baldre, sintí yo dicir a mio má más d'una vez. Que-y lo vengan a dicir a la xente d'angüañu, que nun fae más que dir a carreres d'allá p'acá (en vehículu propiu, de combustible fósil, pa llegar antes, por qu'eso de dir andando déxase pal pocu tiempu d'esparcimientu que tengas o pa cuando te xubiles). Si los d'antes levantaren la cabeza, preguntárense qu'ónde tenemos nos la nuesa. Too a carreres, querámoslo o non: les neñes pal colexu, depués a estraescolares, y en vacaciones que faigan los deberes, nun vaya a ser que se-yos escaeza lo que a base esfuerzu memorizaren... La miseria temporal ye una de les pandemias d'estos tiempos modernos a los que mos avezamos. Ún piensa que pa ganar más perres tien que trabayar más y faer más y más rápido, pero la realidá ye que cada vez tamos más autoexplotaes y más precaries, anque visto d'otra manera, les muyeres nos pueblos viven mejor qu'antano. Esti estilu frenéticu e inhumanu de vida fae que la disposición de tiempos seya perdesigual, marxinando a les persones ensin un trabayu remuneráu (o xubilaes) a llevar la etiqueta de non-productives, cuando precisamente ye gracias a eses persones que somos; gracias a eses güeles que cuiden a les nietes, gracias a eses muyeres que nun trabayen pero qu'atienden a los sos padres mayores o enfermos. Y nun ye qu'elles tengan más tiempu qu'otres, pero dedíquenlu a tar con persones que-yos importen y a les que quieren. Pero, dime tu que te mates a trabayar por perres, ¿cuántu (tiempu) tienes pa tar colos que quies, seyan fíos, padres o amistaes? El mundu tórnase llocu y nun somos capaces d'atopar fórmules xustes pal repartu equitativu del tiempu de vida nin de fixar un ritmu xustu de trabayu.

Qué contate de la otra de les riqueces que tenemos y perdemos: l'abondancia espacial; esa manera tan especial que tenemos les persones de pueblu de tar nel mundu; un mundu

ampliu, infinitu dientro de la so finitú, non solo visual y simbólica, sinón existencial que va más allá de les portielles (como decía mio güela qu'en paz tea), ya qu'aunque aparentemente haya muros y sebes que compartimenten los praos, nun son del too reales, ya que siempre son hackeables, ya fuere gracias a una saltadera o simplemente porque abríes el carril que dempués volvíes a zarrar al pasar. Les nuses realidaes espaciales nun tan reñíes pol mitu de la propiedá privá, porque tola vida la xente andaba prau a traviés, pa nun arrodiair ¿entiéndesme?, porque nun diben azotaos en coche peles caleyes, sinón que caleyaben per elles. Pero la perda d'espacios de vida nun vien dada únicamente pola manera de desplazamos, tamién ye un reflexu de la forma na que configuramos el nuesu vivir. Volviendo al mitu de la propiedá privada, hai xente que piensa que lo que te fae ser de pueblu ye vivir n'una casa en vez de nun pisu. En parte doi-yos la razón, pero hai de matizar una pizquiña mejor. Una casa de pueblu cumple más requisitos que ser una vivienda unifamiliar de tipo chalé de Somió o de La Fresneda. Si bien les cases de pueblu tendíen a ser grandes, solíen selo por dos razones: una, la xente vivía del campu y necesitaba espaciu pa producir lo que comíen ellos y los sos animales; dos, n'elles vivíen varies xeneraciones de families numerosas, i.e. "casa ónde cupieres, bienes los que pudieres". Û antes vivíen seis o siete persones, agora con un poco suerte viven dos... pero en nengún casu la tipoloxía tradicional de pueblu fue la vivienda unifamiliar moderna que mos venden güei, qu'además, non solo nun persigue nengún propósiu campesinu de soberanía nin enerxética nin alimentaria (válgame comunitaria) sinón que pretende alexáse d'él, relegándolu a una función escenográfica simbólico visual, pero que ta destinada a dar les aboquíes porque nun hai reciella que lu reproduza. Quiciabes l'habitabilidad d'esos espacios resulte, ensin duda, más cenciella y amañosa qu'antaño porque yá nun tienes que facer cola pa dir al bañu o porque acinques un botón y préndete la calefacción. Nun pretendo idealizar les miserias d'otros tiempos. Namás aspiro a que reflexionemos sobre les que nun amenacen agora pa que nun perdamos lo que de verdá importa.